

UTUSAN MALAYSIA

DATE: 09 / 09 / 2007

## Jangan cepat merajuk bila berpolitik – TPM

UM - 9/9/2007

PEKAN 8 Sept. – Datuk Seri Najib Tun Razak mengingatkan ahli UMNO agar jangan mudah merajuk apabila gagal memperoleh sesuatu yang diinginkan.

Katanya, mereka perlu memiliki nilai perjuangan yang tinggi dan tidak sepatutnya berkecil hati dengan perkara-perkara remeh seperti tidak mendapat kemeja-T.

Beliau menegur ahli-ahli parti yang kerap mengaitkan soal prinsip dan pokok apabila gagal memperoleh sesuatu yang mereka idamkan.

“Nilai perjuangan kita perlu lebih tinggi, takkanlah setakat tidak dapat kemeja-T pun nak merajuk,” katanya semasa berucap merasmikan penghantaran 172 ahli Pemuda UMNO Pekan menghadiri kursus pemantapan jentera pilihan raya di sini hari ini.

Najib yang juga Timbalan Pre-

siden UMNO menegaskan, politik adalah satu proses yang menuju kepada kesejahteraan rakyat.

Justeru, katanya, setiap ahli UMNO perlu bersedia berkhidmat kepada rakyat pada setiap masa tanpa memikirkan kepentingan diri semata-mata.

Dalam pada itu, mengulas mengenai kemungkinan pilihan raya umum diadakan pada bila-bila masa antara tahun ini hingga 2009, beliau menasihatkan setiap ahli parti supaya bersiap sedia.

Jelas beliau, segala usaha keras yang dijalankan sejak pilihan raya umum terakhir pada 2004 sudah semakin menghampiri kemuncak.

Timbalan Perdana Menteri menasihatkan mereka menyediakan jentera yang kuat untuk menghadapi sebarang kemungkinan dalam pilihan raya nanti.